

ENAAAN EO AN HILDA C. HEINE
PRESIDENT EO AN REPUBLIC EO AN MAJOL
ILO KWELOK EO AN NITIJELA KEIN KAENOUL RALITÖK

AUGUST 3, 2026

[Marshallese Version]

Naan in Kile ko

Iḷkwe komwōj aolep.

Ikonaan moktata kobawaj ipam Speaker ilo an Kien in barāinwōt lewaj naan in buromoj, barāinwōt kamṃoolol ilo ilok in an ro mottadean ilo Nitijela in. Rijerbal ro rar rub enbwinnier iumwin elon iio ko ilo aerro mootlok – Tony Wase im Langidrik Mote.

Ij kamṃoolol Anij kōn tōl im kōjparok eo an iood im Aelōñ Kein ad. Ejja ilo kilaan kamṃoolol in wōt, ij kile im kautiej kabuñ ko ad— Reverend Lawson Matauto, Chaplain eo an Nitijelā, im Mrs. Matauto, koba ḷok ippān rūkaki ro ilo kabuñ ko kajjojo. Jar im tōl ko ami ilo jetōb rej wōnmaanḷok wōt ilo jipañ laḷ in ad im ri-tōl rein ad.

Ij leḷok aō kile im kautiej eḷap ñan ri-tōl ro ad ilo manit— Chairman eo an Mweo Imōn Irooj ro, Irooj Lanny Kabua; Vice Chairman eo, Farrend Zackious; ro uwaan Kōonjel eo an Irooj im ro karejeraer. Ij bar kwaḷok aō kautiej ñan ri-tōl ro ad ilo manit ilo Mājro in, ilo aolepān aelōñ ko kajjojo, im barāinwōt ro rej jokwe ilo laḷ ko ilikin Aelōñ Kein.

Ij bar kile Speaker Wase, Vice-Speaker Zackhras, im ro karejeraer; ro uwaan Cabinet eo im Nitijelā eo; barāinwōt baamle ko aer.

Ij barāinwōt kwaḷok aō kile im kautiej ñan Chief Justice Carl Ingram, Jāj ro an Marshall Islands Judiciary eo, im ro karejeraer.
Ij kile im kamṃoolol Chief Secretary eo, Chairperson eo im Commissioner ro an Public Service Commission eo, kobaḷok ippān Secretary ro kajjojo im Jeban *Department* ko, Agency ko, im Opij ko, im State-Owned Enterprises.

Ij barāinwōt kwaḷok aō kile im kamṃoolol ñan *ambassador* ro ad rej jerbal ippān ro jerad im mōttad ilo laḷ ko itulikin Aelōñ Kein, im barāinwōt kile baamle ko aer.

Ij bar kile im kamṃoolol ro uwaan *diplomatic corps* eo— Ambassador ro an Japan, Republic eo an China (Taiwan), im Australia; Charge de Affaires eo jān Amedka ilo Mājro in; ro mōttad jān U.S. Army Garrison eo ilo Kuwajleen; im Honorary Consul ro ad im baamle ko aer.

Ij barāinwōt kile Mayor eo an Mājro in, im ro uwaan Kōonjel eo an, barāinwōt aolep Mayor ro im Kōonjel ko ilo local government ko, koba ippān ro karejeraer.

Ij bar kamṃoolol ri-tōl ro ad ilo *private sector* eo, NGO ko, im doulul ko im rej jerbal ippān jukjukin pād ko ilo aer loloodjaki jerbal ko im rej kōkajoorḷok laḷ in ad.

Im āliktata, ij kwaḷok aō kamṃoolol koṃ aolep — armej in Majol, ro rej pād ijin, ak ijoko kajjojo ilo peḷaakin laḷ in.

Mr. Speaker, jej kobatok ipan doon ilo juon tore eo elap limotak ko i pelaak in laḷ in. Aploñloñ kein rōkōṃṃan bwe wāween kōjparok jukjukin pād ko ad en oktak lok im ḷapḷok ad modjaki. Wāween ko rejelōt mejatoto rō-ṃōkajḷok kiteer jān ad kar kōtmāne. ḷapḷok in woṇāān ṃweiuk im kaan ko rej wōnṃaanḷok wōt ilo aer jelōt *weween mour im pukot jeramman*. Im jukjukin pād eo an laḷ in ej iioon mālejjoñ ko jān wōt tariṇae, an laplok ablōnlon ikotaan laḷ kein jen doon, kin eweween kein aolep menin aikuj eo eidiñ in bwe jen kate kij jerbal ippān doon.

Mekarta apañ kein, ak Aelōñ Kein Ad rej wawa wot ion aeneman ilo aer jorkatkat ion kejatdikdik im jeramman. Eṃōj ad bōk buñtōn ko rōḷḷap ñan kōjparok ad kiene kōj make, kōkajoorḷok ad jeḷā tuwōn mour, im kōpooj ilju im jekḷaj eo an armej ro ad. Rainin, ij kwaḷok jet tōprak ko eṃōj aer bōk jikier im rej alikkar ilo wōnṃaanḷok ko an Aelōñ Kein Ad ilo an laḷ in innitot an oktak lok.

Kōkajoorḷok Kōjparok im Kien Anemkwōj ñan Aelōñ Kein

Inaaj ijjino kōn aeneman im jokane eo ej pedpedin laḷ in ad— aenōṃṃan im ad jokane im ilo ad jenolok einwot juon laḷ eo ej kiene e make.

Iloan wod in bwid ak ijoko rej ba “Indo-Pacific”, jorrāān ko ikōtaan laḷ ko jet, ajeededḷok in uno ko rōkkajoor, im jumae doon ko rej ḷapḷok wot. Ñan pukot na mejlan joraan kein, laḷ in ad eaar kōṃṃane kwelok eo mōktata ikijjien National Security im Substance/Drug Summit, im eaar kakobaiktok ri-tōl ro ilo ṃanit, jōdikdik ro, kabuñ ko, im ra ko an kien ñan pukot mejlan an ḷapḷok an uno ko rōkkajoor deḷōñtok ilo Aelōñ Kein Ad. Jān kwelok in, eaar maroñ ejaak *framework* (juon ṃōṇakjān jerbal) ikijjien kapenlok im kabojrak an ajeeded uno ko rōkkajoor.

Ilo an ḷapḷok jerbal in etale im kejparok laḷ in ad, juon wāween eo eaorōk, jaar maroñ in kōkajoorḷok bujen jemjerā ko ad ippān laḷ ko ipelaakid ilo juon koṇ, ak ejaake juon MOU kāāl ippān laḷ ko ilo Pacific in im Taiwan. Bujen in ej kaalikkar im kōmeleleik ijoko koṇaad jān doon ñan kōjparok im bōbrae laḷ jiddik kein jān an itok jorrāān ko jān tu likin Aelōñ Kein.

Im ilo an kar itaaktok waan lomor eo ad, RMIS *Jelṃae*, juon menin letok jān armej ro im kien eo an Australia, jerbal in etale ko ipelaakin meto in ad enaj kanooj in tiljek im kajoorlok. Ilo iien in ej ḷapḷok an armej ro rupe kakien ko im anemkwōj in eṇwōd, wiakake, im jab kōjparok meto ko ipelaakin Indo Pacific, RMIS *Jelṃae* ej āinwōt juon ri-bōbrae im ri-kōjparok meto im men in jeraṃṃan kein ad, im aenōṃṃan eo an laḷ in ad.

Kōkajoorḷok an armej maroñ in jelṃae im bōbrae jorrāān ko jān oktak in mejatoto

Ilo ad kōkajoorḷok wāween ad kōjparok kōj, jej barāinwōt aikuj pāpjelṃae pelaak ko pelaakid im jorrāān ko aetok kūtier itok wōt jān oktak in mejatoto.

Ilo iiō in, elukkuun alikkar ke DinDin in Mejlep ak El Niño enaj ḷapḷok ilo Pacific in, im enaaj ḷapḷok an mōrā aelōñ ko ituiōñ in Aelōñ Kein im ḷapḷok an wōt ilo Mājro im aelōñ ko

iturōk. Wāween oktak kein rej menin keeañ ñan kōj bwe jen jino bōk buñtōn ko raorōk ñan kōpooj kōj ñan mōrā in im ad maroñ in jelā pukot mejlan.

Emōj ad bōk jet buñtōn ko rōllap ilo ad kōkajoorlok maroñ ko ad āinwōt juon laḷ. Ilo weween kejparok pelaak ko ad, jaar kadedelok juon koñ, National Oil Spill Contingency Plan, ippān United States Coast Guard im NOAA, ñan etale bwe aelōñ kein ren pojak ñan jelmae jorrān ko ilo mejatoto ilo iien in iaḷan wa ko ipelaakin laḷ in rej pād ilo kauwōtata itok wōt jān aploñloñ kein rej waḷok. U.S. EPA eaar lap an kile Majuro Water Quality Laboratory eo ad ak Jikin Etale Erreo in Dren, im likūt Marshall Islands ilōñtata ibwiljin jejjo aelōñ ko reddik ipelaakin laḷ in— juon tōprak eo elap tokjān ilo tōre in ej laplok an jabwe dān ipelaakin laḷ in im ilo Aelōñ Kein Ad.

Ilo ACWA (Addressing Climate Vulnerability in the Water Sector) Project eo, emōj kadepakpaklok aikuj in ñan kabwe nien dān ko ilo aelōñ kein im kōlaak 161 Flatpak Modular Tanks (FMT) ak baantuun ko me rōkkar ñan oktak in mejatoto, eo ej kobaiklok 2.7 miḷien kaḷan in nien dān ko— juon tōprak in jermal eo elap an aorōk ñan jelmae Diñdiñin Mājlep in ipelaakin Pacific in. Elōñlok jān 100 iaan *system* kein emōj im dedelok aer eḷlaak ñan nien dān ko ilo jukjukin pād ko im ewōr joñan in 1.4 miḷien kaḷan repojak ñan aer jermal.

Ekeepaak 1000 imōn jokwe ko, im enañin 4,700 armej ro ededelok aer bōk leen jeraamman kein, im enaaj bar wōr nien dān ko renaaj bar kōlaaki ilo allōñ kein rej pedotok. Jej barāinwōt kōkajoorlok jukjukin pād ko ilo katakin im rōjañ er ñan jelā kōjermal im kōjparok dān ipelaakin Aelōñ Kein. Ekeepaak 3,000 ro uwaan jukjukin pād ko— ekoba kōrā, jōdikdik, im ro ewōr utaḡwe ilo ānbwinnier— raar bōk koṇaer ilo juon iien ekkatak ikijjien kōjparok dān, jelā kōn ukottak in mejatoto, im kamminene ko ikijjien tiḷjek im kōjparok. Ilo an jukjukin pād ko ejaak im kōjermal *water safety plan* im barāinwōt *drought contingency plan* ko, raar laplok aer maroñ in kōppopo kōn kilen kōjparok dān, ejaak doulul ko ñan kilen kōjparok dān.

Pedped ion jermal kein, eaar maroñ in ejaak juon būlān eo kein kajuon ikijjien *nature based solutions* (kojermal jela ko ad kin kejparok barijet ko ad) im eaar kōmman ilo Arṇo im Mile, juon jermal eo ej ekkejellok ippān National Adaptation Plan (NAP) eo im ej kaalikkar wāween ko rejejjat tata im rej jermal ipelaakin laḷ in ikijjien oktak in mejatoto.

Einwot ke elaplok kapanpan ko rej jelmae kij ipelakin laḷ in ilo ad kajeon kojoor kij jen ukottak in mejatoto, elaplok an ro rej eddo jermal in pukot jeen in jipan ko nan ad kattor NAP eo ad, ri jermal ro ilo CCD, ak ra ej erroiki jermal kein raar maron kadedelok juon proposal tarrin \$10 million aurokin im lemaanlok nan Fund for Responding to Loss and Damage, motton program in jipan ko an UN. Jej reimaanlok nan an itok jipan ain elonlok melele ko nan kejparok parijet ko ad.

Kōmman Jermalin Ekkal ko Rōkāāl im Jermal ko an Public

Ilo ad kōkajoorlok wāween ko ñan ṇa mejlan apañ ko kōn oktak in mejatoto, jej barāinwōt wōnmaanlok wōt ilo ad kōmman jermal in ekkal ko im jermal ko rōkkar ñan aikuj ko an armej ro ad.

Jermal in ekkal ko an imōn kwelok eo an Nitijelā ej wōnmaanlok wōt, im kōppopo ko ñan kalōk Capital Building eo ekāāl ej barāinwōt wōnmaanlok wōt.

Jaar wōnmaanlōk im kadedeiklōk Stage 1 eo an Majuro Master Plan eo, juon *plan* eo eḷap an ḷap im kobbwā ilo bwebwenato in Aelōñ Kein.

Jaar kōjeraamman jikin eo emōj kālōt ñan kajutak Headquarters eo im Imōn Kalbuuj eo an MIPD, juon menin kōppopo eḷap ñan aenōmman im jokane eo an aolep armej im jermal in kōjparok aenōmman ilo jukjukin pād eo.

Jaar kōjparok bajet eo an laḷ in kōn jejjo buñtōn ko komani nan kōjparok kojerbal jarom iumwin iien in ej ukoktak wōñān kaan.

Im jaar kōkajoorlōk iaḷan ito itak ilo mejatoto kōn mālim eo ilo ad kajeon tobar airport safety requirement ko ñan jino kojerbal 2 Cessna 408, baluun ko rōkāāl im ededelok aer tobrak tok ilo Ailin Kein; jermal eo ej bok jikin kio nan lolorjake jikin jok im kelok ko bwe ren safe im pojak nan an jok palun kein rekaal; jermal in ear komman ilo Wotje week eo lok im ej depakpak lok nan aelon ko jet ilo week kein manwaj; dedelok in aolep men men kein enaaj komman an innitot ad bōkto-bōktak rinañinmej ilo iien idiñ im poleman iaḷan ito itak ñan aelōñ ko ilikin.

Kōkajoorlōk Kakien, Kien Pokake, im Maroñ Ko An Jikin Ekajet Ko

Jermal in ekkal ko rōkajoor im emman rej ekkejjeḷ lōk wōt ippān kakien im jikin ekajet ko rekajoor (institutions) ñan dāpij wōt kien anemkwōj ilo laḷ in ad.

Ilo iiō in, emōj ad kōkajoorlōk pedped ko ikijjien ekajet jimwe ilo wāween jitōñ ro rekkar ñan loloodjake eddo ko ilo Jikin Ekajet eo ad Euteej tata (Supreme Court) eo, ñan dāpij wōt bwe en tiljek ijoko routiejtata ilo jikin ekajet kein ad, im dāpiji wōt iien roñjake ko ñan etali jemlōk ko im rej dāpij ekajet jimwe im tiljek ipeḷaakin Aelon Kein in ad.

Jaar barāinwōt kowōnmaanlōk jermal in tōl ilo imōn ekajet ko, ilo an kōrā ro rej jāj kar bōk degree ko routiej lōk ikijjien laws ak kien— juon buñtōn eo ñan kwōnmaanlōk im kōkajoorlōk jikin ekajet ko ad.

Kōkajoorlōk Iaḷan Jeramman im Kien Ko

Ilo ad kokmanmanlok Kien anemkwōj, jej bareinwot koonmanlok im kōkajoorlōk iaḷan jeramman ko ñan jipañ kajjojo armej in Majel.

An ḷaplōk wōñān mour, apañ ko ilo iaḷan leto-letak mweiuk, im ilo an ḷaplōk wōñān kaan rej wōnmaanlōk wōt ilo aer jelōt iaḷan boktok jeramman ko ilo peḷaakin laḷ in. Aelōñ Kein emōj an eoroñ wāween in kōn karōk ko repen im rekkar ñan lale jān, im bujen jemjerā ko rej kōjeban kōj.

Emōj ad boktok jidik jān jān World Bank eo im ej ñan jipañ ikijjien apañ ak oktak ko ikijjien wōñān kaan im mweiuk, ekoba jān in jipañ ko jet ñan baamle ko ejjeḷok aer jikin koone.

Jekar kōkōmanmanlōk jermal in kōmman eowōj (*tax*) ilo Aelōñ Kein jān jān in jipañ ko jān IMF, World Bank, im ADB — juon oktak eo elap an aorōk bwe en to kūtien ad kōjerbali jān kein ad ilo an oktaklōk wāween kappok jān in jipañ ko ipeḷaakin laḷ in, im deḷōñtok in kōjjemōj in jān ko ad make ḷapḷok wōt ilo aer aorōk.

Jaar kajutak Monetary Authority eo an Marshall Islands, ñan kōkajoorlōk wāween makūtkūt in jān ko, ejaak wāween kōmman kōḷḷa ko, im kōkajoorlōk pedpedin iaḷan jeramman ilo an mōkaj an oktaklōk jekjekin karkan jān ko an laḷ in.

Jaar bar kōkāal kallimur ko ad ilo Sustainable Development Goals (SDGs) ko ilo an dedeḷok Voluntary National Review eo Kein Karuo, ak juon jermal in etale ko ad make kin wonmaanlok ko ad ikijeen SDGs kein.

Ikijjien kōjparok jokane, juon joor eo eaorōk ñan iaḷan jeramman, MISSA eaar letok jilu allōñ in kōḷḷa jān Social Support Scheme eo ñan 1,239 leḷḷap im lōḷḷap ro, ekoba ro ewōr mōjñō ilo ānbwinnier, kadepakpaklōk jipañ ñan baamle ko elap aer aikuj ilo iien in ej wanlōñlōk wōñāan mweiuk.

Jemlok in lok alon in, MISSA enaj barāinwōt kadedeiklōk ajej in ENRĀ eo eliktata ilo iio in jino in ñan elōñlōk jān 40,000 ro raar bōk jeraamman, ak tarrin 95% iaan armej ro rej jokwe ilo Majel in.

Ej juon iaan tōprak ko rōḷḷap ñan jipañ armej im epād ilo bwebwenato kein ad, im ej juon menin jokane eo elap ñan baamle ko ipeḷaakin Aelōñ Kein.

Leḷok Jipañ ñan Na Mejlan Aikuj Ko ñan Kowōnmaanlōk Jelālōkjen ñan Armej Ro

Maroñ eo ñan jelā kijenmej ilo iien eñtaan im pukot mejlan apañ ko enaaj jermal ñe jenaaj jipañ armej ro ad – kowōnmaanlōk wāween ko ñan pukot jelālōkjen, kōḷapḷok kapeel ko aer, bwe ren jet ri-tōl ilju im jekḷaj.

Jekar kōkajoorlōk jelālōkjen ilo jelā riit im jeje, im manit ilo an kar tōprak elom jen 128 bokin riit ko emōj jei ilo kajin Majel (with English translation), kaalikkar juon tōprakin jermal eo elap im emōj an dedeḷok ilo laḷ in ad.

Ejja ilo kotopar in nan kōjparok manit in ad, College eo an Aelōñ Kein ear jino juon Associate of Arts tiikri kāal ikijjien Marshallese Studies ak katak ko kōn manit, kajin, bwebwenato im men ko bwinnid ilo Aelōñ Kein. Juon tōprak ḷapḷap eo ej kab maanje in an wōr ilo laḷ in.

Jekar ejaake juon wāween ekāal ñan kōkōmanmanlōk ājmour an rijikuul ro ilo aer mabuñ im kōraelep ilo jikin jikuul ko 86 an Kien, ej kaalikkar bwe Majel in ej laḷ eo kein kajuon emōj an jino kōmmane wāween in jān *preschool* ñan kilaaj 12.

Emōj an depakpaklōk kōttōpar eo ñan pukot jelālōkjen ilo *level* ko routiejlōk im elōñlōk jān 100 rijikuul emōj aer diwōjlōk jān USP, kōn *masters degree* im ko routiejlōk.

Jej wōnmaanlōk wōt ilo ad jipañ im rōjañ rijikuul ro ñan pukot jelālōkjen ilo jikuul ko routiejlōk im kōḷapḷok kapeel ilo aer bōk kamminene ko, ilo aer bōk jipañ ko jān Marshall Islands Scholarship, Grant im Loan Board eo. Ewōr 77 rijikuul ro emōj aer diwōjlōk iio in,

erubw juon *record* in joan ri kaduojlok ilo juon iio ekkar nan bwebwenato in Scholarship Program in ad.

Elōñ wōt iaan rijikuuł rein raar diwōjłok emōj aer rołtok im rej jermal, ak jet iaer rej wōnmaanłok wōt im kadedeikłok aer jikuuł bwe ren rołtok. Bujen jemjerā ko ad ippān ro mōttad jān lał ko ilikin ej wōnmaanłok wōt ñan jipañ ikijjien scholarship im program ko jet nan lemaanlok jełāłokjen.

Ewōr elōñłok jān 150 rijikuuł in Majel ro ededełok aer diwōjłok jān jikuuł ko ilo Taiwan jān jino in an kar ijjino Taiwan Scholarship Bürookraam eo, im ewōr 20 rijikuuł ro rōkāal im rej pojak in emmakūt in jikuuł ilo Taiwan ilo iio in 2026 ñan jibadek tiikri ko routiej łok jen Taiwean. Scholarship ko jet jen Australia im Japan rej wonmaanlok wot.

Jej kile im kautiej rijikuuł in Majel ro im elukkun emman aer ekkatak. Iio in, Ms. Makiara Silk Jibas, jiroñ in Majol eo jino intata im emōj an dełōne juon iaan university ko rebunbun ilo lał in im ej pad Amedica, Harvard University. Jiroñ in ej kōttōpar bwe en bok juon an Master Degree kōn Social Psychology, eo enaj lelok kapeel nan an jermal ipan ri jikuuł ro eoktaklok aer ekkatak im kolmenlokijen jen ro jet. Presidential Scholarship eo an Taiwan im RMI ej lelok tuition support nan Makiara im family eo an im ro jet rej kate ir ilo program ko repin im jenolok. Tōprak in an jiroñ in, im barāinwōt tōprak ko an rijikuuł in Majel ro jet im rej jikuuł ilo jikin jikuuł ko routiej im buñbuñ ilo lał in, ej kalikkar ke rijikuuł in Majel elap maron ippeir, rōkapeel im maroñ kobałok im jiāe ippān rijikuuł ro jet ilo pełaakin lał in.

Ñan aolep rijikuuł ro im rej jibadek jikin jełāłokjen ko routiejłok tulikin Aelōñ Kein, ak ro rej pojak in jikuuł, lał in ami, elap an nebar kom im utiej būruon kōn kom. Ilo kijejeto ko ami, mwilimi, im kijenmej ko ami ilo ekkatak rej kalōk ilju eo an lał in ad.

Kōkajoorłok Ājmour, Aenōmman im Jokane

Mr. Speaker, wōnmaanłok ko ad ilo jełāłokjen rej ekkejel łok ilo ad tiljek bwe armej in Majel ren łapłok aer ājmour im jełā tuwōn mour.

Ikijjien ājmour, emōj ad kōmman oktak ko rōllap bwe en lōñłok ro remaroñ taktō, en kajoorłok jermal ko raorōk im elap aikuji, im kōkōmanmanłok tōprak ko raitok kūtier ñan armej rein ad.

Emōj ad jino būrokraam in kakōlkōl ñan HPV, bwe kōrā ro ren maroñ kakilen er make, maroñ loi tōprakin kakōlkōl ko im taktō ilo ejja raan eo wōt.

Jaar kōlaplok jela im kapeel ipan rijermal ro ilo jikin ājmour, elaptata health assistants ro, ikijjien leto-letak ājmour ipelaakin Aelōñ Kein im lełok kamminene ko ikijjien wā ko an ajri, bōk im leto-letak mejele ko ikijjien *family planning*, im kilen kakōlkōl ko rōmōkaj ñan aer maroñ in loe nañinmej in *autism*, im bwe jermal in bok ejjmour en eepaake łok im komman imōko kajjojo ilo kapijuknen ko.

Jaar bārainwōt ejaake National Autism Referral System eo jino intata, im kobaikłok ājmour im jełāłokjen bwe ajri ro ewōr utamwe ippāer en mōkaj ad kile aikuji kein aer.

Jaar rie im kōmālim National NCD Strategic Plan 2025-2029 eo, ñan ejaake juon an Aelōñ Kein mōñakjān in jerbal ñan bōbrae an loñlōk ro rej jako jān nañinmej in tōñal, menono, im kāānjer— āinwōt ke rej un ko rōllaptata im armej rej jako jāni ilo laḷ in ad.

Jej kiiō etale juon oktak ñan kōjerbal juon third party *administrator* ñan karōk im kōkmanmanlōk jerbal in ājmour ilo hospital ko ruo rellap ad, juon karkan jerbal eo im ej bar bok jikin im emman an jerbal ilo woden bwil kein ilo Pacific in.

Kōttōpar in ad emarōñ lam-waan ilo ad lale lōk: juon jikin taktō eo ekāāl, erreō im emman peḷaakin, im ejejjet ñan aikuḷ ko an aolep rinañinmej ro.

Kowōnmaanlōk Jimwe an to Nukuḷier Ejelet ir

Im āliktata, ilo ad reiḡmaanlōk, jej pād wōt ilo ad kijejeto in na mejlan jerbal ko rejjañin dedelōk jān jemaan— ad pukot jimwe ikijjien nukulier kokkemelmel im ro ear jelet ir im mour ko aer.

Ilo an ḷaplōk an laḷ in kile ke ejjab jimwe maḷūtkūt ko raar waḷōk ilo bwebwenato in Aelōñ Kein, ad tiljek ñan pukot jimwe ikijeen kokkemelmel kien nukulier ej kijñeñe wōt.

Jaar kadedeiklōk buñtōn ko jinoitata ñan RMI Nuclear Museum im Research Facility eo, juon imōn Aelōñ Kein eo enaaj dāpij wōt bwebwenato ko ad im juraake jerbal in etale ko jān epepen ñan epepen.

Jaar jaakemaanlōk Human Rights Council Resolution 57/26 eo, jān meḷeḷe ko jekar bōki jān ri-Majeḷ ro rej pād ilo Amedka, eo ej kōmman bwe wāween ko rōkar jelōt armej in Majeḷ ren āinwōt juon mennin jineet eo ej iuun maanlōk kōj ilo ad kwaḷōk kōn bwebwenato in ñan laḷ ko jet.

Eliktata, emoj an Cabinet erra nan kelet juon law firm nan jiban Majol kebooj juon Change Circumstances Petition (CCP) ekaal.

Kōjjemlōk

Mr. Speaker, tōprak ko an jiljino allon ko rej jemlok lok rej kwaḷōk kōn juon laḷ eo ej wōnmaanlōk ilo an alikkar an meḷeḷe im wōr unin maḷūtkūt ko an.

Jej kalōk juon laḷ eo eḷapḷōk an koṇ, juon laḷ eo eḷapḷōk an jeḷā tuwōn mour, juon laḷ eo eḷapḷōk an jeḷālōkjen, im juon laḷ eo ej jutak pen ilo an pukot ekajet jimwe.

Tōprak kein rej kaalikkar juon Kien eo ej pedped wōt ioon tōprak in jerbal, armej ro ie reperan, jeḷā tuwōn mour, tiljek, im wōnmaanlōk wōt ilo kōttōpar ko ad ilo Aelōñ Kein.

Jej kwaḷōk ad kamḡoolol eḷap ñan laḷ im doulul ko rej jipañ kōj, ekoba Amedka, Taiwan, Australia, im Japan— ko im eḷap aer jutak ippad im juraake kōj ilo aer kōkajoorlōk maḷūtkūt ko an Aelōñ Kein.

Jej barāinwōt kile doulul ko jān elōñ laḷ im ko rej jipañ ilo iaḷan jāān bwe eḷap jo-koṇaer, ekoba World Bank, Asian Development Bank, im Green Climate Fund, barāinwōt doulul ko an Pacific in, ekoba Pacific Islands Forum, Pacific Community eo (SPC), im ro mōttad ilo UN, ro im būokraam ko aer rej kowōnmaanḷok wōt menin kōttōpar ko an armej in Aelōñ Kein.

Ippān doon, jej ṇa wāween karkan, kilen, weween im iien jermal ko rōmman, ko im renaaj juon KŌTO EMMAKRORO ṇan laḷ in bwe en ḷapḷok an aenōmman, jokane, im mweie ilju eo an.

Im ilo ad wōnmaanḷok wōt, bōro wōt juon im jeḷā ke kajoor wōt wōr, jenaaj dāpij wōt jitūbōn jermal in WŌDDE JIPPEL.

Kōn wōt bōro kuk im kijejeto ko ad, jenaaj **jek ṇa lōmān** Aelōñ Kein ekkar ṇan aikuj ko ad, im Aelōñ Kein ej an ajri ro nejid im jibwid ilju im jekḷaj.

ṇan kōjjeṃḷok naan in aō, ij kwaḷok juon aō naanin kōjeraamman ilo etan Kien eo ṇan aolepān rijibadek ro raar ettōr ṇan ConCon eo ej pojak in bōk jikin, im ṇan aolepān armej ro raar kōmmani jo kāālōt ko aer.

Kom emmool kōn ami tiljek ilo eddo ko ami āinwōt armej in laḷ in ad.

Ij reiṃaanwaj ṇan juon ConCon eo enaaj ḷap tōprak ko ie.

Ikonaan barāinwōt door an kien im armij in Aelon Kein naan in kojeramman nan Kramer Family / PII kin 50th anniversary. Juon company eo ej jutak ippan kien im jermal ilo kalōk Aelon Kein iumwin elon iio. Jej barāinwōt lelok ad naan in kojeramman nan MIR, jilnuul iio anniversary an hotel in ad, jermal im kōtōprak aikuj ko an kien im armij in Aelon Kein.

Anij en kōjeraamman kōjwōj aolep, im Anij en kōjeraamman Ailin Kein Ad.

Kommooltata.